

東
華
續
錄

東華續錄

咸豐六十八

臣王先謙敬編

臣陶澐宣恭校

咸豐七年丁巳正月乙卯內閣欽奉 上諭 懿妃晉封爲 懿

貴妃○己未諭軍機大臣等恆春奏籌辦回匪情形請暫在省城調度一摺並另片密陳漢回構釁根由等語回匪未經起事之時原應設法安撫今既戕官踞城叛逆顯著豈有尙主招撫之理卽如大理府匪徒以投誠誘官致被戕害此輩甘心謀逆豈肯就撫此時兵力不足則民間齊團正是要著疊降諭旨原令先剿後撫解散良回今該省道府等官已爲回匪所愚儻該督等再受劣員慫恿不使逆回痛受懲創安能帖服恆春等旣分兵前赴大理開化等處著卽飭令帶兵各員痛加剿洗早復城池不得專事姑息

致令蔓延益甚舒興阿既經在省復有藩司桑春榮幫同辦理足資彈壓恆春著遵前旨帶兵出省擇要勦辦不可株守省城坐誤事機將此由五百里諭令知之○以慶廉爲浙江布政使調瑞璜爲浙江按察使以保泰爲福建按察使由興泉永道遷○調清盛爲湖南按察使毓科爲雲南按察使○辛酉諭內閣英桂奏擒匪分竄毫境官兵奮擊疊獲勝仗並斬擒匪首多名一摺逆首龔得之弟龔義率領悍賊數千竄至亳州洪家廟地方我軍奮勇截殺當將龔義擒獲其著名擒首雷燕李汶亮等五名亦均同時殺斃復於王家店地方生擒擒首黃得等二十餘名王家店迤東生擒擒首白豹等四名餘匪向東南竄逸仍著英桂嚴飭在事將弁將各路匪分投勦洗並將首逆龔得張落刑等迅速殲擒毋稽顯戮○諭軍機大臣等英桂奏稱該營見存馬隊馬匹倒斃過半兵丁間有

傷亡請飭前調湖北馬隊迅速赴營等語見當剿捕捻匪喫緊之時馬隊最關緊要察哈爾官兵不服水土傷病過多實屬難期得力著官文酌度情形如官軍沿江東下馬隊可以從緩卽著調撥一千或二千名迅赴亳州交英桂再行分撥若能撥給二千名則兵數較多必須大員統率卽著傳旨令都興阿統帶前往其餘湖北存營馬隊仍另派大員管帶以資得力將此由五百里諭令知之○呂佺孫以病免以慶端爲福建巡撫瑞璜爲福建布政使徐宗幹爲浙江按察使前任福建按察使○以捐輸軍餉永廣奉天吉林廳學額一名○予河南傷亡副將珠隆阿祭葬世職○壬戌諭內閣王懿德等奏省城糧價騰貴請援案酌免貨稅以廣招徠一摺福建省近日米價踊貴自應招商轉運以濟民食著准其查照歷屆成案採買臺米所有隨帶餘貨均著免稅二成俟糧價漸平卽行

停止○以攻克江南東壩寶堰賊壘賞副將李定太總兵銜餘升
擢有差○予江南陣亡參將馬永清等祭葬世職○癸亥諭內閣
駱秉章奏援剿銅仁賊匪一律肅清擒斬首逆一摺貴州銅仁首
逆就擒業經孝順蔣爵遠馳奏並將出力各員加恩獎敘惟銅仁
府應辦善後事宜前諭令蔣爵遠遴選賢員前往經理茲據駱秉
章奏蔣爵遠仍令王敬烈戴罪自效殊屬非是前署銅仁府知府
王敬烈不洽輿情且有縱勇擾民情事亟應徹底根究嚴加懲治
豈可仍留任事爲劣員開倖進之門王敬烈著卽革任交蔣爵遠
親提查辦所有銅仁府印務並著該撫迅派賢員前往接署○駱
秉章奏臣前調卽選道王鑫帶所部勁勇由臨湘龍窖源進駐通
城搜捕土匪整頓團練漸有起色適報崇陽之石屋洪橋雷裕等
堡圍民連日與賊交戰先勝後敗王鑫率勇急援之賊分三路前

來王鑫設伏待之陣斬悍賊百餘賊眾大奔追至龍船港賊背水
回拒我兵擊敗之追至官塘販白泉橋崇陽縣城之賊出城援應
與官軍遇又敗之沿途斃賊約數百人生擒先鋒賊目九名賊不
敢踞城相抗遁至白霓橋十一月十一日王鑫派遊擊朱南桂等
由左路高回嶺進都司陳品南等由右路子岸進王鑫自率湘勇
由中路進右路官軍先到賊整隊抗拒易普照匹馬陷陣連砍多
賊賊陣始亂百長唐清揚馳馬蹴之朱南桂等由左路掩至陳品
南等復由右路斜擊之官軍縱橫蕩決連斬騎馬賊目十餘名斃
賊五百餘名王鑫縱兵追截直至通山縣二都地方沿途斬獲無
數生擒五十五名奪獲廐馬十五匹旗幟槍械千餘件崇陽遂無
賊蹤王鑫派朱南桂等進剿蒲圻踞城賊目梁一舉逃竄與國適
江西武甯敗匪由建昌折回興國併屯州城聞王鑫方攻蒲圻合

方潛犯崇陽二十一日出賊七八千名至通山號稱數萬由沙坪界頭而來抵白霓橋五路撲營王鑫豫伏以待賊眾漫山而至先撲官軍營盤湘勇示之以怯賊竄擁而進伏兵從林中發劈山礮賊旗紛紛倒地王鑫發號振鼓各路齊進橫衝側擊頃刻屍橫遍野羣賊亂奔大溪山南門洲伏兵截之於前大隊從後猛追之陣斬騎馬賊目八名追至白霓橋約其斃賊二千餘名忽白霓橋股匪出而接應官軍又擊敗之追至路口賊翻山四竄生擒賊目五十四名奪獲大黃旗二百九十餘面擡鳥槍刀矛一千餘件二十五日王鑫率軍追至通山賊又竄回興國州通城崇陽蒲圻通山見已無賊當派官軍分駐重兵臣又札調王鑫暫駐岳州如鄂省上游江西邊界有警卽當出其不意捲甲赴之以壯聲勢上諭此次官軍越境剿捕通城等縣迅就肅清洵屬著有微勞在事出

力文武員弁著駱秉章查明保奏○諭軍機大臣等本日據福興奏豫籌進剿情形並調兵籌餉各摺片江西大股逆匪聚集撫州該將軍由廣信一路前進以次剿洗撫建之賊兼可固浙省門戶籌畫尙屬周妥卽著咨調張從龍所帶民兵與該將軍原帶之兵自爲一軍統歸節制江西如有派撥兵勇更可聯絡聲勢相機進剿所請調廣東兵一二千名由閩道入江並每月籌銀數萬兩協濟等語已諭令葉名琛酌量辦理惟該省見亦有軍務能否調兵濟餉尙未可定該將軍惟當先就見有兵力迅圖剿辦毋誤事機將此由六百里諭令知之○諭福興奏請飭廣東添兵協餉一摺該將軍會剿江西逆匪已抵常山見擬由廣信行走先剿撫州一路因所帶兵力過單請調粵東兵丁一二千人交參將衛佐邦管帶從閩道入江聽調自應酌量添撥以期厚集兵力漸次掃除著

葉名琛妥籌調派前赴福興軍營所需軍餉仍由廣東按月籌解接濟見在吉安未復南贛一帶驛路尙阻此次協餉著葉名琛派員由海道運至上海再由浙江解至江西免致貽誤將此由六百里諭令知之○諭福興奏請飭閩兵出境助剿浙江省按月協餉各等語江西賊氛猖獗該省勇多兵少本屬難資控制此次福興前往會剿所帶兵數僅止千名實形單弱該將軍由廣信行走見擬先剿撫州一路福建援剿江西之兵前因建昌失利張從龍琳潤等暫退杉關等處以圖後舉嗣據王懿德奏復添調福甯漳泉兵勇一千六百名馳往分布此項援軍本非徒防本境福興計日可抵撫州著王懿德卽飭該副將等所統兵勇悉歸福興調遣相機前進不得徒事株守致誤機宜閩兵所需軍餉卽著由閩省協濟以期無缺至江西餉匱已久浙省除按月接濟福興一軍外仍

著何桂清暫行每月籌撥數萬兩以應要需庶師行不至乏食勦辦方能得手將此由六百里各諭令知之○予湖南死事訓導謝仁峻等祭葬世職○甲子諭內閣京師鼓鑄大錢銅鐵並重前經惠親王等酌擬章程嚴定阻撓罪名嗣後諭令崇文門稅局戶部捐局一體搭收原期上下周轉永爲寶貴乃聞近日市閒漸不行使鐵錢以致物價日昂鋪戶間有歇業此必有奸民造言煽惑任意軒輊暗中把持牟利於軍餉民食大有關係著步軍統領衙門順天府五城剴切曉諭儻商民人等敢於阻撓一經查拏卽照前旨初犯者枷號示眾再犯者發極邊煙瘴充軍遇赦不赦以儆刁風至私鑄罪名定例綦嚴近來地方官並不認真查拏因有破碎私錢擾和致民間藉端挑剔仍著嚴密查緝照新定章程辦理其京外地方凡官收民用均宜恪遵功令一律行使聞順天直隸各

屬尚未暢行總由地方官怠忽因循殊堪痛恨著直隸總督責成
藩司認真經理務使中外流通不至阻滯並著順天府嚴飭各屬
實力奉行以重圖法而便民用毋得視為具文將此通諭知之○
乙丑諭軍機大臣等福濟等奏賊陷無爲請撥兵餉及巢縣情形
等語該逆糾合大股復陷無爲竄及夏閣廬州情形喫緊福濟已
帶安銳勇一千名親自回省桐城賊尙兇悍兵勇勢難多調自應
添撥援兵惟直隸屏翰畿疆見在存兵無多山東交界尙須設防
無可調撥吉林馬隊亦無可再調惟湖北有吉林等處馬隊前經
英桂奏調本日已諭令官文等酌分一千名飭赴廬州助剿見在
楚北水軍戰艦已抵九江或可沿流東下攻安慶以分廬州等處
賊勢秦定三鄭魁士務當迅克桐城庶可合兵一處當此餉缺兵
饑毋得遷延貽誤該撫仍當分飭帶兵各員實力防剿毋得專待

外援致有貽誤將此由六百里諭令知之○諭安徽無爲州城復經失守見在該省勦辦喫緊餉糈不支又值年荒米貴自應亟籌接濟葉名琛斟酌情形先籌銀十數萬兩派員解赴福濟軍營以資接濟至山陝兩省本有按月協濟之款著王慶雲譚廷襄設法各先籌銀數萬兩迅解廬州毋稍遲誤將此由六百里各諭令知之○諭前因英桂奏請調撥湖北馬隊當諭令官文酌調一二千名前赴亳州此時皖省緊要卽著該大臣等分撥一千名赴皖協勦毋稍延誤無爲之賊據福濟等奏由武漢蘄黃沿江下竄見在湖北水軍已在九江獲勝若能分水陸兵勇直搗安慶以牽制賊勢則江北之賊當不至肆行猖獗該大臣等務須統籌全局酌量辦理不可稍存畛域之見致有遲誤將此由六百里加緊諭令知之○丁卯諭內閣前因德勒克色楞於領放三盟兵丁賞銀內有

隱匿掩飾情弊降旨革去爵職交理藩院會同刑部定擬罪名茲據該衙門比照成例聲明請旨德勒克色楞著發往熱河交該都統嚴加管束所遺貝子爵職仍准其以德勒克色楞之子承襲以示朕格外施恩至意已革管旗章京烏爾圖那蘇圖著發往新疆充當苦差仍暫行監禁待質俟達瑪林色登案結後再行發遣○諭前據廉兆綸奏參江西按察使鄧仁堃派令伊子鄧輔綸辦理軍務並捐辦城濠等工不能潔已遠嫌致滋物議各情當交曾國藩文俊查明參奏茲據奏稱鄧輔綸督帶兵勇係因平江等勇均籍隸湖南經文俊函商曾國藩派令該員與林源恩統帶並非該員統領全軍至興修礮臺礮城月城等各項工程尙屬工料堅實惟該臬司於興修之始並未照例勘估但求城濠速成以致各委員開報用項浮冒參差弊端百出且在江西年久每好引用同鄉

親族又不能約束家丁致滋物議實屬不知遠嫌鄧仁埜著交部
嚴加議處其各委員開報工程錢數仍著曾國藩文俊逐細確查
按款覈算如有浮冒情事卽著從嚴參辦○官文胡林翼奏九江
爲楚北江西安徽三省咽喉該逆力爭長江恃九江爲總匯而以
對岸黃梅之小池口爲犄角扼險築壘堅不可拔臣等於克復黃
梅後詳查地勢總以先破小池口爲勝算十二月二十二日探報
宿松太湖之賊三四萬人意圖回竄黃梅又以萬人攻撲雙城驛
又以二萬餘人由余家觜出蕪水上竄漢陽都興阿會商王國才
等督隊迎剿適臣胡林翼派鮑超率南勇趕至黃梅軍威益振次
日分投進剿逆眾盡擁出拒我軍縱橫衝擊斃賊數千敗賊仍竄
歸小池口及宿松一帶鮑超等毀其小池口土城及賊壘數座南
岸李續賓與楊載福連日水陸會攻復將九江外土城轟倒而重

濠壘卡賊礮如雨我軍未能深入曾國藩於客臘由豫章至九江面晤都興阿楊載福約會新正來潯力攻九江臣卽飭知水陸各軍仍先力攻小池口撤其藩籬刻下江皖各軍已與楚北聲息相通約期大舉會合夾攻楚北郡縣見俱收復惟小池口一隅賊壘未破至武漢省城重地臣更當妥辦善後以固民心而昭慎重上諭官軍攻毀小池口並九江城外賊壘剿辦尙屬得手著官文等卽督飭將士迅將九江城池克復以期乘勝東下盡掃賊氛毋稍延緩○曾國藩文俊奏查撫州師潰後臨江之賊數日增樟樹之警報頻至新淦縣城復爲賊踞十月二十一日劉于濤督水師潛往襲之城池新葺賊望見官軍甚少負嶠固拒劉于濤等督軍分門力攻連日晝夜不息復以噴筒射入頃刻火起城內鼎沸西門亦放火延燒槍礮乘之聲震山谷各勇緣城而入賊卽開南門

逃竄追逐十餘里殺賊無算其時臨江之賊乘虛來犯樟樹鎮老營從西岸突出李逢春派船上下迎擊賊眾敗退自袁州克復後有賊二三千陸續至臨江在西岸沙湖屯踞撫州樂安復陷有賊三四千在東岸永泰屯踞聲言欲糾合圍撲樟樹鎮營盤劉于溥派蔡康業等沿河直上謝得龍等由隄內包襲專擊東岸之賊衝鋒出戰賊眾敗卻西岸之賊又出二千餘來犯劉于溥令礮船排列河口廣勇川貴勇分兩路鈔襲斃其首逆偽張指揮賊盡敗退次日賊出大隊來犯東西兩岸水陸兵勇登岸衝殺賊眾引退我軍鼓譟乘之殺賊六百餘名二十七日賊復兩岸來犯相約投誠我軍方推心待之該逆忽放排槍傷斃官軍五人各弁勇憤甚登岸力戰我猛進則賊退我稍卻則賊又進回合十餘次斃賊八百餘名苦戰六時之久賊始退遁該逆又於杜家村築礮臺三座用

木桶架砌中實以土外挖深濠十分堅固官軍不得所以破之之法適臣等派康國器水軍前往二十九日至樟樹鎮尙未紮營一擁登岸劉于濤派兵與之同進該逆分五隊迎拒馬隊當先勢如潮湧劉于濤親督兵勇大呼衝陣康國器昇小礮擊必命中賊稍畏懼劉于濤施放一窩蠟火箭賊遂潰敗我軍乘勝追北蔡康業圍攻賊營縱火環燒無一得脫遂毀其杜家村礮臺三座連日之戰斃賊約六千餘人道員劉于濤以水陸二千之眾拒兇悍十倍之賊實屬謀勇兼優顧懇天恩賞加巴圖魯名號蔡康業懇請賞換花翎其餘出力員弁等擇尤保獎上諭江西賊黨復踞新淦縣城經劉于濤督飭水陸兵勇蔡康業等四面火攻登時克復臨江之賊屢犯樟樹鎮老營復經蔡康業等奮力擊敗追殺甚多記名道劉于濤著賞給圖薩太巴圖魯名號蔡康業著賞換

花翎其餘出力員弁著准其擇尤保奏○曾國藩文俊奏

臣國藩

於十二月初一日由江西省河赴吳城鎮與道員彭玉麟商酌水

師進剿事宜楊城福督水師於十一月二十九日直抵九江焚奪

賊船殆盡李續賓督陸師追剿南岸賊匪於十二月初九日進攻

九江府城

臣

查外江水師上年正月赴湖北援剿是時戰船或入

內湖或爲風損僅存一百四十餘號駛至武昌今陸續添至四百

餘號李續賓陸軍上年八月赴湖北援剿是時羅澤南李續賓所

帶湖寶各營僅五千人今添至八千餘人該二員馳驅數省轉戰

三年所向有功而江甯將軍都興阿統帶之馬隊亦由北岸以至

小池口

臣

由吳城馳赴九江迎勞諸軍見其軍威嚴肅士氣撲誠

自十二至十八日環攻六晝夜並未收隊楊城福李續賓都興阿

聯絡契合愛敬交至雖積勞之後屢勝之餘猶復日夕兢兢衣不

解帶不特東三省馬隊忠勇可風卽湘營與水師亦實爲不可多得之勁旅惟是餉項匱乏應請飭催山西陝西按月撥解並請飭下廣東按月酌撥以資軍食 上諭軍機大臣等曾國藩等奏請飭催各省月濟餉銀等語楚北楊載福李續賓與都興阿水陸各軍見已乘勝直抵九江會合進剿而餉項匱乏自應亟爲籌撥著譚廷襄王慶雲仍遵前旨趕緊籌解概交胡林翼由水陸解至九江濟用其江西各府分駐之兵勇五萬餘人據稱舊欠無從補給新歲尤難支持亦係實情著葉名琛每月籌撥銀四萬兩解至長沙由駱秉章轉解江西以濟急需將此由六百里各諭令知之○諭據官文奏湖北馬隊無多難以抽調自係實在情形湖北水陸各軍見攻九江如卽克復順流可達安慶所有前調馬隊著准其暫停調撥卽飭水陸各軍迅將九江郡城攻克一俟得手卽可直

擣安慶與福濟會合進剿至河南擒匪兵力尙單俟楚兵直抵安慶仍著官文等斟酌情形將馬隊抽撥一千名或數百名前往亳州等處交英桂調遣以資助剿將此由六百里諭令知之○諭據福濟奏皖省上年荒旱僅恃無爲州一隅採買米石見在該州被賊竄陷販賣無從兼之隆冬無雪麥苗難冀滋生未免兵民交困間湖南秋收頗稔武漢既復水路可達廝州請飭趕緊籌辦米糧四萬石等語湖南省歲收雖屬豐稔而見在支應各路防兵需餉不少原恐未能兼顧惟皖省兵民乏食情形亦關緊要駱秉章向於鄰省緩急不存畛域之心此次福濟所請該省能否籌辦米若干石卽著駱秉章酌量情形一面專摺具奏一面派員趕緊辦運至廝州轉由羅田英山運至六安俾資接濟將此由六百里諭令知之○兵部尙書阿靈阿卒贈太子太保賞銀三百兩治喪予祭葬

諡愨勤○曾國藩文俊奏

臣

等據湖南撫

臣

駱秉章咨稱派委

臣

國藩之弟曾國荃帶湘勇二千人與新授吉安府知府黃冕湖北藩司夏廷樾廣東羅定協副將周鳳山先後援師進剿曾國荃由萍鄉入周鳳山由萬載入會攻安福以趨吉郡十一月十二日周鳳山駐軍楓溪距安福城四十里探知大嶺小嶺伏有賊匪卽派守備劉之能等分路進攻殺賊約數十名曾國荃於是日行至江口遇賊迎拒分路擊之殺斃二百餘名生擒十六人窮追三十里申刻卽抵安福克復縣城周鳳山入城安撫兩軍均紮東門之外嗣據探稱通吉安之東路大汾楓田等處屯賊甚多周鳳山等出隊分三路進兵曾國荃派蕭孚泗等由中路進周鳳山派劉之能等鈔右路進歐啟貴等鈔左路進該逆亦分三股迎敵斃賊二百餘名該逆敗竄追過大汾河十餘里正擬移營進剿探知古城永

新有援賊千餘屯聚固江里田並糾合安福敗匪二千餘竄至竹江青一帶思踞河以拒我軍周鳳山由河東北徑擊竹江青之賊曾國荃由樓背洋口兜剿里田之賊周鳳山行三十里竹江青股匪先遁曾國荃偵知賊在洋口對河之千金壇山上各弁勇赤身涉河賊列陣山腰又伏賊出隴中大村翼擊官軍之旁簫孚泗等禦中左兩路而張開輯偃旗蛇行由右路包出賊伏之外羣賊由山半乘高撲下槍礮兼施我軍屹立不動賊眾下山甫畢我軍衝鋒擁進眾勇大隊繼之羣賊奔竄追殺五里至橋東村賊踞石橋相拒思俟伏賊之勝卓旗回戰不意官軍追騎掩至刀矛相格張開輯之伏兵從右路鈔出伏賊之旁中路之賊頓失所恃首尾不能相應大敗狂奔我軍窮追六十餘里外之固江亭子奪獲洋槍礮械籐牌四百餘件殺賊千餘名臣等飭令乘此聲威迅攻吉郡

或可得手成上游建瓴之勢以固南賴天險又奏饒州餘逆屢次受創之後糾集都昌彭湖各處匪黨八千餘人盤踞鄱陽縣所屬之泥灣一帶防軍都司畢金科等督兵進剿該逆糾合四五千分五股直撲我軍畢金科等亦分五路迎敵鏖戰數時該逆抵死不退畢金科下馬衝入賊陣已革都司岳炳榮由松嶺之旁潛襲賊後該逆首尾不能相顧我軍乘勝窮追斃賊四百餘名生擒六十二名十一月十六日據報前竄饒州之聶張二賊與新到李邱賊目各帶匪黨來犯官軍營壘畢金科等以我軍僅二千人賊眾數倍不可力勝但可智取當派千總龔廷貴等五百餘人於初更時乘暗潛赴陶溪渡復派百餘人分布各路叢林埋伏以作疑兵十七日賊分兩路而來一由陶溪渡一由童子渡龔廷貴等由左路遠包以防童子渡之賊鈔襲後路朱洪章等由右路繞過山後

橫出以截之岳炳榮向前迎敵而自率親兵策應頃刻間龔廷貴等已鈔左路賊後朱洪章等亦將右路之賊截爲兩段叢林中伏兵四起呼聲雷動畢金科縱馬衝突官軍回合力擊無不以一當十賊黨大敗我軍兩路窮追至卧虎山青田埠兩處殲斃及生擒共九百餘名二十三日該逆竄踞縵州地方畢金科卽派隊前進甫抵離縵州三里該逆兩路列陣而待畢金科等督隊接戰伏賊齊起勢如潮湧我軍四面受敵幾不能支龔廷貴等躍馬衝陣斬大旗賊目一人中路親兵突起衝擊雜以噴筒火箭該逆敗北畢金科截住橋頭擒斬尤多賊多揭衣渡港我兵投鞭追至村後金龍橋擊斃及生擒千餘名仍飭畢金科等嚴加防守一俟鄂師進攻九江酌量調赴湖口水陸會剿均報聞○戊辰調全慶爲兵部尙書以文彩爲工部尙書肅順爲左都御史調基溥爲戶部左侍

郎以景廉爲工部右侍郎

由內閣學士遷

○庚午廣西巡撫勞崇光奏太

平府屬土匪次第剿除並將盤踞府城匪黨殲除淨盡報聞○辛未祈穀於上帝○諭軍機大臣等前因邵燦庚長奏關保全永馬隊過境助剿獲勝准其暫留徐郡俟直隸馬隊到時再令酌量飭赴懷遠本日復據該漕督等奏察哈爾官兵未到關保一軍連次獲勝實爲得力請仍暫留徐州等語著照所請准其暫留防剿其察哈爾馬隊到徐之日著邵燦庚長飭令徑赴懷遠不必調換設或南路緊急准其調二百五十名分往援應不得此留彼調徒事遷延致有貽誤徐州爲南北要衝古來形勝之地見在兵力甚單匪蹤往來無定實爲喫重前經英桂奏令袁甲三酌帶兵勇往徐州會剿是否得有勝仗能遏兇鋒亦未據續奏英桂在亳州調度兵力已不爲單所請湖北馬隊已據官文奏未能分撥福濟亦

曾請調此項馬隊須俟攻克九江方能到皖再行酌撥此時尙難
議及止可各就見在兵勇妥爲布置矣再據秦定三奏桐城兵單
糧缺請飭福濟籌米接濟等語桐城當進攻喫緊之時賊悍兵饑
情形急迫甚屬可憂福濟身任疆圻豈能置軍餉於不顧著卽籌
運糧米解往秦定三軍營俾免缺乏將此由六百里各諭令知之
○官文胡林翼奏臣等懇奉諭旨飭籌楚軍進剿機宜查臣等於
武漢克復後卽派李續賓由南岸進剿都興阿等由北岸進剿楊
載福督水師由江路進剿見北岸自黃州至黃梅南岸自武昌至
興國均已肅清崇通一帶亦俱搜捕殆盡李續賓行抵九江偏城
而營與都興阿力攻六晝夜毀拔城外木城斃賊甚多楊載福將
九江賊船焚燬曾國藩由南昌至九江與李續賓會合進攻惟小
池口賊壘尙未攻拔復派副將鮑超馳往進攻馬步連獲大勝興

國州已派候補知府邢高魁帶勇六營駐紮投剿餘孽兼爲李續
賓後應安徽之英山太湖宿松望江皆與湖北接壤賊眾尙多臣
等派王國才駐紮黃梅之大河鋪界嶺嚴截要隘孔廣順駐紮蘄
水之孔隴驛再撥巴揚阿馬隊二百名爲各路援應以固楚北門
戶臣等通籌大局我軍已據水陸上游若能深固不搖實操破竹
建瓴之勢所可慮者江西七府未平吉安瑞州臨江南康九江皆
與兩楚相近是武昌尙有肘腋之慮若由通城崇陽興國一帶竄
越緊逼武昌反出九江各軍之上且全師東下不能不以武昌爲
後路根本兵弁之更番換替糧餉軍火之轉運採辦皆倚武昌且
武昌漢陽兩郡一江相望形勢天成唇齒輔車相爲鎖鑰漢口巨
鎮經三番蹂躪殘破一空必須趕緊招輯撫綏經營建置使民庶
安居商賈復業而後可通百貨而利轉輸竊念戰守兩端今日勢

難偏廢武昌爲全省之頭目漢陽爲南北之咽喉控制荆襄四通
黔蜀北達豫陝自古皆設重兵以鎮之若舍而弗顧則根本不固
枝葉易搖遠議遠征殊非控制之道擬俟司道入城布置釐定臣
胡林翼卽馳往九江與曾國藩相機商辦先清江西七府會合水
陸東剿皖江臣官文相機籌畫南北兩軍節節進取仍步步嚴防
庶軍行無返顧旁掣之虞報聞○癸酉諭內閣軍機大臣彭蘊章
等奏請酌撥庫款採買糴米並戶部奏飭商認買糧石定價平糶
各一摺見在京城糧價昂貴旗民生計維艱亟應設法周轉著戶
部卽行籌款發交順天府府尹於近京地方購買米麥運京酌定
價值准令米鋪以錢票及銅鐵大錢承買出糶時並准其每石酌
加京錢一二百文亦將錢票與銅鐵大錢並收俾商民兩便糧食
不至缺乏大錢亦得流通惟民間待食孔殷採買尙需時日著照

戶部所議傳集糧行經紀酌中定價於五城內外擇股實鋪戶取具保結赴官號認領錢票寶鈔承辦各項糧石公平發糶並准旗民人等持見行銅鐵大錢按照定價赴該鋪購買所得錢文准令該糧店抵還庫款其大錢除破碎不堪使用者准其挑剔餘概不准挑揀以平市價而濟民貧著順天府五城卽行出示曉諭用副朕軫念民艱至意○乙亥諭內閣給事中張修育奏道府捐輸獎敘請明示限制等語各直省候補候選道府人員捐輸軍餉等項准其記名遇有本省缺出請旨簡放施恩已極優渥而該督撫等或請遇有各省缺出簡放未免漫無限制此後除軍營保舉不計外所有捐輸及別項出力人員止准請旨記名遇有本省缺出簡放不得請放各省之缺以示限制○丙子諭內閣河南巡撫英桂前因剿匪無功降旨革職暫行留任乃自去冬以來又經數月仍

未能督率鎮將實力勦捕株守亳州匪蹤四出竄屬調度無方著
交部議處察哈爾都統西凌阿所帶皆係勁旅乃屢次敗退不勝
統帥之任著一併交部議處河北鎮總兵崇安駐兵雒河被匪撲
陷已有應得之咎姬家橋之敗幾致賊蹤西竄陳州追追賊至臨
渙集地方又復漫無紀律爲賊所乘似此屢次挫敗竄屬恇怯無
能著交部嚴加議處西凌阿崇安均著來京聽候部議所有西凌
阿原帶馬隊著交穆騰阿管帶勝保見己賞給副都統銜幫辦勦
匪事宜著暫行署理河北鎮總兵印務崇安原帶官兵悉歸統帶
英桂務與勝保袁甲三等勦力同心迅圖蕲事毋再遷延致干重
罪○邵燦庚長奏捻首張落刑李月韓狼子王廣愛李大濤等暨
旗糾眾意欲攻撲瓦子口伊興額率領馬步各隊攻宿州之張家
奇樓賊巢史榮椿關保亦率馬步攻永城之岳家集匪巢均於正

月初七日與賊接仗伊興額殲匪三百餘名生擒十七名委防禦博崇武陣斬擒首王廣愛一名委驍騎校穆克特布生擒擒首范闊一名其燒斃及追殺之匪無算並斃大胡莊鐵佛寺援賊二百餘名史榮椿關保亦將擒首李月巢穴焚燒淨盡訊據賊供張落刑時與粵匪通信如被官軍擊敗卽赴懷遠迎取粵匪再行北犯等情臣等已飛飭在事各員乘勝進軍不容延緩至委防禦博崇武前次擊斃擒首陳佃元今又陣斬大擒首王廣愛洵屬奮勇可否賞給巴圖魯勇號以示獎勵其餘打仗出力員弁兵勇擬歸入徐州解圍案內彙覈請獎 上諭徐州迎剿擒匪大獲勝仗委防禦博崇武前斃擒首李佃元今又陣斬王廣愛實屬奮勇著賞給齊拉巴圖魯名號其餘出力員弁兵勇著准其歸入徐州解圍案內彙請獎敘○諭軍機大臣等勝保奏接准福濟函稱令由鳳翔

進剿揆之事勢未能盡協等語捻匪於皖豫交界地方肆行滋擾固須四面兜剿尤應防其北竄若徒以重兵由鳳潁進攻則歸陳等處喫重關繫殊非淺鮮本日已諭令勝保幫同英桂辦理剿捻事宜未能前赴該撫軍營鳳潁爲皖省統轄地方福濟責無旁貸著卽派得力官兵迅速馳往剿捕該處捻匪毋令再有蔓延自干咎戾將此由五百里諭令知之○賞藍翎侍衛勝保副都統銜幫辦河南剿匪事宜○辦理防河事務左副都御史王履謙乞解職養親允之命河東河道總督李鈞督同河北道周士鏗辦理防河事務○調清盛爲直隸按察使以劉源灝爲湖南按察使

由光祿寺少卿

○以捐輸軍餉永廣四川遂甯縣學額五名縣巴各四名仁壽

岳池三臺安岳宜賓富順大竹眉邛各三名溫江彭簡崇慶縣竹德陽萬梁山達資陽內江南充廣安中江蓬溪樂山榮隆昌大邑

蒲江瀘各二名成都華陽灌什邡新津雙流金堂郫漢江油彰明
羅江安江北長壽江津永川榮昌大足涪合南川銅梁墊江新甯
渠資閬中南部巴西充蓬營山儀隴鄰水射洪樂至雅安名山峨
眉洪雅夾江犍爲威遠南溪高彭山丹棱江安合江敘永各一名
○丁丑諭內閣前因給事中宗稷辰奏請招商買米並捐米平糶
一摺當交御前大臣軍機大臣會同戶部議奏茲據載垣等會議
具奏該給事中所稱順天府屬寶坻武清等縣米麪甚賤並計及
奉天販運請飭出示招徠等語著盛京將軍奉天順天各府尹直
隸總督各飭所屬州縣剴切出示曉諭商民人等務將米糧源源
運京俾捐生得以及時購買其經過地方准其照例免稅以廣招
徠所收米石或留備倉儲或接濟平糶俟集有成數再由該部酌
議具奏○諭前因御史保恆奏請疏通大錢並聯順奏請定交納

章程暨轉運糧石先後諭令御前大臣軍機大臣會同戶部安速
議奏本日據載垣等會議具奏京師行用銅鐵大錢總由直隸省
未能設法疏通以致情形壅滯自應亟籌變通著照所議順天直
隸各屬錢糧卽自本年上忙爲始著以實銀四成實鈔三成當十
銅鐵大錢三成按成搭交其零星小戶應交錢糧不足實鈔之數
者准以大錢抵交所交實鈔大錢數目按照見定章程辦理一切
用項亦照成數搭放該府尹總督迅卽刊刻謄黃徧行曉諭務使
民間家喻戶曉按章輸納朕聞直隸州縣徵收錢糧或勒捐實銀
私換鈔票種種舞弊該上司不能嚴加參劾均堪痛恨嗣後如敢
仍前疲玩不收實鈔大錢勒令交銀或經民間呈控或有人參奏
定將該州縣照枉法例從重治罪如該上司徇隱不參著戶部奏
請嚴加議處至所請由部派員赴各府會同徵收取結報部存案

之處恐有名無實轉滋煩擾卽著該府尹總督責成該道府等於所屬開徵時嚴密查訪有弊必懲儻有徇庇等情該上司亦無從藉詞諉卸其私鑄大錢罪名前經從重定擬而愚民無知仍多藐玩自應盡法懲治著步軍統領順天府五城暨直隸總督嚴飭所屬實力緝拏如查有私鑄匪徒卽照所議無分首從均於訊明後就地正法以儆刁風甲長鄰居隱瞞不報分別徒流治罪該地方官自行拏獲者於訊辦後由該上司奏請獎敘如被鄰境訪拏卽將該地方官從嚴參處至捐銅局搭收大錢前經戶部議定章程每銀一兩搭收大錢六百文其崇文門左右翼稅銀應如何分成搭收當十大錢之處著該鹽督等迅速酌覈具奏官民錢鋪如有囤積制錢收買私鑄者著步軍統領順天府五城一體查拏嚴辦似此詳加整頓大錢既可疏通卽糧價自然平減所有鄉間米石

仍著該府尹等飭令各屬曉諭務使照常販運公平糴糶以濟民食○戊寅諭內閣給事中宗稷辰奏發往東河例不開缺請仍遇事陳奏一摺殊於體制不合京員發往河工學習卽歸河督統屬雖未開本缺豈能仍以言官自居該員於河防事宜如果確有所見儘可呈明河督斟酌辦理若竟自行陳奏又安用河督爲耶至東河漫口雖一時未能興築而此外應辦工程尙屬不少豈得謂無工可學宗稷辰旣發往東河學習應聽該河督量才差遣所奏著不准行○諭英桂奏進攻擒匪平毀賊巢一摺擒匪自疊受懲創以後堅匿趙旂屯老巢經托津阿等分帶馬步各隊進攻匪眾潰走生擒擒首李振山等二十餘名立將賊巢焚毀其逃竄尹家溝一路賊匪經朱連泰等合力進剿直抵賊巢餘匪敗竄生擒擒首張鳳等三十餘人立將賊圍平毀其竄往高家寨擒匪經袁甲

三派員堵截斃匪百餘名奪獲軍械多件餘匪逃逸此股擒匪被
剿窮蹙猶復負隅死守此次痛加剿洗並將匪巢焚毀著英桂督
飭鎮將務將首逆殲擒毋任漏網○諭軍機大臣等福濟奏請飭
催江西礮船並酌帶米石等語九江安慶相爲犄角曾國藩既有
先撥礮船二百隻協攻安慶之議不但可斷賊援九江之路兼可
分桐城後路賊勢見在安徽賊匪麇至無爲廬江復陷兵力甚單
著曾國藩卽遴派大員督帶礮船下駛以資攻剿至廬州一帶旱
荒米糧缺乏兵食萬分艱窘並著文俊酌撥米石卽交各船裝載
帶赴皖省俾福濟一軍得有接濟將此由六百里諭令知之○諭
見在廬江復陷賊黨屬至情形實屬喫緊著福濟督率帶兵各員
實力防剿俟江西援兵到日水陸夾攻當有轉機見在撥餉未到
兵力饑疲並著督飭藩司竭力設措不可一籌莫展坐待鄰省協

濟致誤事機將此由六百里諭令知之○予廬江陣亡副將鮑霽
蕭等祭葬世職○己卯諭軍機大臣等前據御史宗稷辰奏請飭
川楚派兵合攻黔省苗匪當經諭令吳振械恆春蔣霽遠駱秉章
體察形勢籌議具奏旋據駱秉章奏稱調派參將萬年新等統帶
兵勇二千餘名由靖州赴黔會剿並歷陳山川形勝今昔異宜所
奏極爲明晰吳振械於未奉此旨之先業已派署永甯營參將鍾
海統帶兵練一千名前赴黔省聽候調遣並據聲明各該省防堵
需兵不敷再調自係實在情形本日據蔣霽遠奏請川楚二省各
分兩路進兵每路需兵五六千名並援雍正年間剿辦苗匪之案
必須厚集兵力實屬不知時務從前用兵一隅自易徵調見在各
省紛紛滋擾不獨兵力不敷抑且餉需支絀斷難照議辦理惟貴
州匪散方張兵分見少吳振械駱秉章能否於前調兵勇外再行

撥兵各數百名赴黔會剿所需兵餉川楚兩省派員支應毋令缺乏著卽酌量情形一面調撥一面奏聞貴州產米無多蔣爵遠請令湖南採買米石運赴鎮遠以資接濟並著駱秉章斟酌妥辦此時川楚前調兵勇計可先後抵黔著蔣爵遠會同孝順督率本省將士協力進剿奮勉圖功勿得藉口兵單致滋貽誤將此由五百里各諭令知之○兩廣總督葉名琛奏英吉利於上年十一月初七日攻東定礮臺經我軍擊沈船隻殲斃多名復因該國人放火欲燒西關民房轉風自燒洋樓巢穴一空我兵屢次擊毀輪船又將勾串股匪擊敗奏入諭以設法駕馭操縱得宜勿貽後患○鄧仁堃緣事降調以惲光宸爲江西按察使前任江西按察使○于貴州被戕從九品閻錚祭葬世職○加賞五城煮賑米石○庚辰諭內閣怡良趙德轍奏請仍照前議截漕濟餉一摺江蘇海運漕糧前經

部議礙難截留業已降旨依議茲據該督等奏稱上年江蘇省旱蝗成災徵收有限米缺價昂餉需無出自係實在情形所有江蘇省起運交倉漕糧著准其截留二十五萬石以充軍餉○諭軍機大臣等本日據載增等奏股匪張三彪等勾結四川遊勇裹脅貧民在竹山縣地方滋擾官軍攻剿獲勝餘匪由房縣興山竄入宜昌府城等語此股匪徒本係烏合何以常恩等並不認真兜剿致該匪肆行奔突竄入府城宜昌距荊州甚近防剿不容稍疏官文見派李光榮盧又熊分帶川勇各千餘名追剿尙恐兵力不敷著會同胡林翼酌量抽撥官兵與常恩等所帶兵勇並署松潘鎮德恩等合力迎擊務將府城迅卽克復並將此股匪徒悉數殲除勿令再至蔓延儻帶兵各員堵剿不力卽著嚴參懲辦綿洵見已抵任卽應帶兵出城擇要駐紮相機迎剿載增富森督率兵勇在城

內嚴密稽查以資鎮定宜昌文武各員於賊匪攻撲時毫無防範致郡城失守著官文胡林翼卽查明該員等下落據實參奏將此由六百里各諭令知之○壬午御前大臣載垣等會議給事中吳惠元奏籌流通大錢請於長蘆鹽課按三成搭收從之

二月癸未朔諭內閣前因恆春奏遵旨審擬已革副將陳得功罪名當經降旨將陳得功發往新疆效力贖罪並准其暫留雲南戴罪立功茲御史李培祐奏陳得功素習邪教黨與眾多彌勒縣戕官匪犯卽其黨與該革員縱令逃逸並爲首匪黃緣贖罪入黔以後於郎岱地方將投誠苗民圍殺冒功以致苗民痛恨都勻等處城池失陷革職以後將其黨與布散於開化邱北等處深恐別滋事端等語種種情節殊屬可惡陳得功著卽行發往新疆不准留於雲南效力並著恆春派員剋日起解毋許逗畱經過地方並著

妥爲押解儻有疏虞惟該地方官是問○乙酉曾國藩文俊奏查

瑞州奉新經

臣

等分派大兵圍攻而由西邁北至於九江中間建

昌武甯德安等縣數百里間均有逆黨盤踞往來遙爲奉新聲援而建昌近接省城武甯近接興國州尤爲賊匪出沒嘯聚之區十一月初六日_臣等派千總張金璧等帶勇馳往建昌攻剿初九日抵三角湖焚毀把卡賊船二隻整齊隊伍分四路直撲小河口老巢賊匪亦分股迎敵鏖戰兩時賊始敗退我軍跟蹤力追殺斃溺斃四百餘名陣斬守城之賊目吳姓及來援之德安賊目卽將建昌縣城克復嗣聞該縣仍被德安之賊竄踞十二月初一日_臣等復派張金璧等前往攻剿賊於距城八里之廖姓村迎敵張金璧等直前擊之賊黨潰亂紛紛入城我兵四面環攻勇氣百倍親兵丁世昌等首先登城衝勇繼之共斃賊五百餘名生擒五十三名

復將縣城攻克又據代理武甯縣知縣冒溶稟報十月初八日賊匪二千餘自鈕絲嶺犯境舉人柯芬管帶平江勇與駐紮橫路之李述攀豫定前後夾攻之計行至芭蕉地方遇賊接仗擊殺五百餘名賊眾大潰由旁峽分竄又斃六百餘名生擒二百名十八夜賊復分股撲營意圖鈔襲甫至楊神坪張瑞嵐等伏兵出其不意開礮轟擊斃賊多名二十三夜賊目張佩五率黨千餘由瑞昌王家鋪撲紫鹿嶺營官軍從後截擊賊盡棄械越嶺而逃生擒張佩五回營二十八日賊眾四千人由黃坊清溪港兩路入犯柯芬等四圍兜擊斃賊二百餘名十一月初一日至初七日疊次追賊我兵小有挫折舉人劉馨翰等招集潰勇力圖再戰初十日賊出千餘人至石口渡焚劫我軍人人思奮斬馘四百名逐北四十餘里十一日四面攻城賊由東門竄出皆爲鄉團擒殺立復武甯縣城

又據李續賓稟報自大冶興國追賊東下十二月初六日行距瑞昌縣十里之亭子山該逆聞風遁去經該縣練勇鈔擊殲賊多名生擒二十五名當將瑞昌縣城收復李續賓一面進駐九江一面派兵收復德安縣城又據道員劉長佑稟稱十一月二十日新喻賊目朱一點率眾二千勢將上竄劉長佑派隊馳赴分宜並催候選知府蕭啟江進屯洋橋互爲聲援二十三日賊果悉眾來犯楚勇奮擊破之十二月初三日賊匪分股扼守寶山初八日我軍屯紫界首是夜進剿寶山李能通率眾先進劉坤一麾眾繞向山後賊勢不支乃敗入城中義勇逐之而入賊出東門逃遁收復新喻縣城義勇又從下游渡河邀擊賊首尾受敵狂奔四竄被我軍追殺二百餘名生擒五十名又據同知趙煥聯稟報十二月初九日派左右兩營進紮永新之橋頭初十日趙煥聯督中營越山而進

探知甯新交界之泥湖坳有逆黨設伏守隘十一日且探且進該
逆分三路來犯趙煥聯分三路擊之中路之賊先敗左右同時奔
潰殲斃賊四十餘名十三日行抵縣城我軍甫入南門偵知賊伏
城外五里之蕉碧村趙煥聯率眾奮擊大敗之殺賊目二名餘匪
五百餘名克復永甯縣城臣等仍激勵諸將規復九江各府城俟
西路局勢大轉卽當分兵東路掃蕩羣醜上諭內閣江西自前
年冬間各府州縣多被賊陷經曾國藩等派撥兵勇分投剿辦上
年十一月及十二月克復建昌武甯湖北李續賓一軍由大冶興
國追賊東下將瑞昌德安二縣收復湖南劉長佑趙煥聯兩軍先
後克復新喻永甯兩縣江西大局漸有轉機仍著曾國藩等激勵
將弁將九江等處合力攻剿趕緊收復毋稍延宕○曾國藩文俊
奏湖南候補知府吳坤修管帶鄂省援師來江協剿十一月初八

日探知建昌之賊將欲上犯安義派彰武軍丁峻等馳往迎擊初九日賊匪攻撲安義我軍佯北誘賊折回擊之割取首級者百有九顆追奔二十餘里保全安義縣城並約會副將普承堯來奉新助剿鏖戰三時賊黨大敗斃賊計在六百以外二十一日賊來誘敵我軍力戰窮追忽於樹中衝出悍賊吳坤修揮眾苦戰經時賊旋敗竄二十四日逆黨大舉來犯我軍俟其情歸開壁逐之賊遂大敗我軍又於營外修築長濠立壩遏水該逆邀瑞州悍賊於十二月二十三日黎明乘霧來撲我營我軍鏖戰六時割取首級八十四顆從此賊堅閉不出吳坤修嚴飭各鄉趕辦團練以相協助時在籍紳士御史帥方蔚等督令比戶練丁各持器械二十七八九等夜賊由南門出城赴各鄉擄劫頃刻聞聚集團練數萬人鳴鑼震天賊知官兵方盛團練又成始有逃遁之意正月初五日吳

坤修派隊直逼城下焚其更樓各營由北門獅山梯繩而上該逆由西南兩門奔竄列炬追殺斃賊極多三更時克復奉新城池生擒老賊六百二十一名臣等查逆黨之在江西專以堅守爲長策自九江瑞臨等六府之外又以全力守湖口奉新二縣蓋以湖口與九江爲唇齒奉新與瑞臨爲犄角故也吳坤修先拔奉新以剪瑞賊之羽翼實屬謀勇兼優仰懇 天恩交軍機處記名以道員請旨簡放其力戰捐軀之把總陳有才請飭部照守備例議卹外委余瑞林請照千總例議卹 上諭湖北援兵前赴江西克復安義靖安嗣復圍攻奉新上年十一月賊眾蠡擁出撲經候補知府吳坤修約同副將普承堯會兵助戰斬擒甚眾該逆復邀聚瑞州悍賊撲營官兵直逼城下鄉團併力環攻克復奉新縣城勦辦尙屬奮勉湖南候補知府吳坤修著交軍機處記名以道員用陣亡

把總陳有才著照守備例議卹外委余瑞林著照千總例議卹○
諭軍機大臣等前因察哈爾馬隊需用馬匹諭令崇恩挑選營馬
二百五十四匹解赴徐州並將缺額之馬酌量買補本日據該撫奏
稱各標存馬通省覈算尙不足二百五十四匹之數覽奏實堪詫異
兵丁差操馬匹最關緊要山東爲南北衝途當此鄰省多事之秋
早知營馬缺乏何不急籌買補所需馬價能值幾何而斤斤以經
費短絀爲詞尤屬藉端諉卸除此次所調馬匹已諭由江蘇購備
外所有山東缺額營馬卽著崇恩趕緊籌款次第買補嗣後遇有
調撥若再藉詞推諉惟該撫是問將此由五百里諭令知之○諭
前因襄樊餘匪勾結遊勇竄陷宜昌諭令官文胡林翼抽撥官兵
迅速進剿並以荊州防剿喫緊諭令綿洵出城迎擊載增富森在
城巡防本日據載增等奏官文所派之李光榮因川勇猝變歿於

營中盧又熊所帶之勇雖將另股竄荆之匪擊退而宜昌尙爲賊踞有船一百餘隻匪眾五千欲圖水陸竊伺荆州該郡爲楚省上游重鎮萬不可稍有疏虞載增等已令都司宗維清帶兵一千赴宜昌迎剿又令德恩所帶川兵錫齡阿所帶滿洲營兵與盧又熊所帶之勇分投策應並將李光榮原帶礮船委員管帶會同水師都司周邦富沿江防禦布置尙屬周妥惟兵分力單尙恐不敷堵剿見據胡林翼奏稱已由官文派撥水師都司左光培並巴揚阿張萬祿馬步各軍前往荆宜該撫復添派寶營義營兵一千二百人赴援是否足資攻剿仍著官文胡林翼酌量情形或再於大營內抽撥官兵迅將宜昌府城克復力遏其下竄荆州之路綿洵尙未列銜奏事如未經抵任卽著兼程前進仍遵前旨在城外駐紮相機迎剿官文胡林翼雖相距較遠仍應勤加偵探隨時調度常

恩德安阿昌阿追剿不力業經摘頂示懲若再不迅復宜昌致令
荊州有警卽著嚴參治罪此股匪徒勾結川勇居多且李光榮所
帶川勇又已中變大營遣散川勇正在陸續過荊若令再有勾結
必致更肆猖獗著載增等一面妥爲彈壓一面實力勦辦毋致顧
此失彼至所請籌撥鄰餉此時鄰近省分實已無款可撥著官文
胡林翼卽由武昌糧臺酌量撥給毋令缺乏將此由六百里各諭
令知之○以浙江練勇出力實在籍已革巡撫許乃釗五品頂帶
○丙戌 上御經筵○尊藏 宣宗成皇帝實錄 聖訓於乾清
宮○諭軍機大臣等本日據福濟奏粵匪捻匪勾通請催馬隊速
赴鳳定堵剿一招見在蒙城懷遠定遠等處捻勢鴟張意圖南竄
與粵匪會合亟應扼要堵截勿令該逆等互相聯絡以致不可收
拾徐州情形見已稍鬆所有關保全永馬隊如可飭令赴皖先其

所急著邵燦等酌量辦理穆騰額所帶馬隊業經啟程昨諭英桂另派大員前往接替著卽飭令迅速前往臨淮一帶協剿擒匪竄突靡常固當截其南趨亦不可驅之北竄英桂見在亳州當體察情形移營進紮勝保計已馳抵軍營如懷遠一帶亟須截剿卽可督率崇安所帶之兵會同德勒格爾馬隊相機進剿以防金陵賊匪勾通擒匪南竄之路毋得區分畛域致誤事機福濟另片奏請飭秦定三鄭魁士移營分路堵剿等語桐城賊勢熾集該提鎮等紮營城下糧道不通情形危急該撫欲令秦定三移營呂亭等處堵賊北竄並令鄭魁士折回迎剿廬江以杜內竄廬州之路惟移營有似退守而分兵又恐力單且俟郝光甲阿克敦兵勇到後如果糧道可通得有轉機再由福濟體察機宜與該提鎮妥商辦理以顧全局將此由六百里加緊各諭令知之○以集團禦賊永廣

安徽休甯縣文武學額各三名祁門各二名○予安徽殉難知縣歐陽黎照等祭葬世職○丁亥諭軍機大臣等勝保奏探聞捻匪南竄潁州請截留官兵添調將領各等語已諭知桂良王慶雲飭令保衡馬翰忠速赴亳州一帶聽候調遣矣該匪竄聚潁境各逆首皆在其中則亳州官軍已出其後勝保卽應探明賊蹤向前迎擊先遏其西竄豫境之路再行節節進剿勝保此時當已行抵亳州與英桂會商分投進剿務使該匪南不能會合粵逆北不能擾及歸陳則潁州嘯聚之眾不難次第殲除英桂身爲統帥亦當督兵前進相機兜剿不得因有勝保在前徒事株守湖北凱撤陝甘官兵見過河南著准其截留歸勝保統帶龍澤厚一軍本止一千一百餘名見在湖北宜昌失陷房竹餘匪尙未肅清陝西邊防正關緊要未便遽行調撥勝保本有崇安所帶官兵加以見留之兵

再與英桂會商抽撥兵力已不爲軍且德勒格爾馬隊正由徐州前赴懷遠穆騰阿亦向臨淮一路迎剿自可會合進兵聯絡聲勢不可任其紛竄更擾完善之區將此由六百里加緊各諭令知之○諭勝保奏剿捻喫緊見在亳州軍營得力員弁不敷差遣請飭山西汾州營參將保衡直隸密雲都司馬翰忠赴營差委等語該參將等曾隨勝保打仗知其臨陣勇往著桂良卽飭馬翰忠王慶雲卽飭保衡迅速馳赴勝保軍營聽候調遣俾資得力將此由五百里各諭令知之○予先賢孔氏孟皮配享 崇聖祠先賢公孫僑從祀 文廟○胡林翼奏上年十二月初九日李續賓陳師九江城下會同提臣楊載福籌商水陸環攻之策復曳運三板於內湖以攻之自十二月十三日更番攻城閱六日夜不息我軍負薪填濠城外之椿柵竹籬焚拔殆盡二十九日湖口縣援賊大至城

內賊匪齊出接應一由龍開河繞甘棠湖涸處渡港而來約三四千人李績賓督令何紹彩等嚴陣以待伺其渡港逾半奮力擊之賊大敗回竄偏至港邊梟水而逸李朝斌率內湖三板闌壩轟之斃賊六七百名一由小東門出會合援賊列於八里坡約六七千人李績賓督令胡裕發等分途迎剿鏖戰四時我軍益奮斃賊七百餘名陣擒僞將軍劉松綢僞旅帥徐添方等十七名老賊張羣材等九十餘名其僞燧淹斃於湖港者約數百名奪旗械四百餘件至北岸小池口與九江對峙賊造石城業已二年城外築壘濬濠密排礮位江甯將軍都興阿與楊載福會商於新正初五日本陸馬步合力攻之以參將鮑超會同各路馬隊四面攻撲同時並進直造賊營踏毀南路土壘十座北路土壘十座關卡六座小壘無數殺賊五千餘名僞水淹斃者無算生擒僞檢點蕭逆僞指揮

陳逆並老賊七百餘名奪獲馬多匹大礮七十三尊劈山礮十六尊擡槍鳥槍八百桿刀矛旗幟無算臣思南服之要惟襄陽荊州武昌爲最重次則莫切於潯陽見在逆首林啟榮日夜添設守具聚集米糧攻勦不易得手臣反復籌思惟有長塹圍困之一策見飭興工開濬並先圍攻小池口賊城以期迅速克復奏入報聞

○戊子祭

大社

大稷

○己丑諭軍機大臣等容照奏擒匪見

在情形需用馬隊攻勦等語據稱擒匪人多糧少正可就此用計使其自相併吞儻接有密報而宿州並無馬隊追勦恐失機會請將徐州懷遠馬隊准其臨時調取數百名應用自因兵力不足起見見在伊興額等馬隊疊次在呂家樓張家奇樓獲勝卽在宿州界內如有緩急儘可朝發夕至德勒格爾所帶察哈爾兵尙缺馬匹昨令邵燦庚長採買補額著英桂勝保察看情形如果容照所

奏實有把握卽就近酌撥馬隊數百名前往策應一面知會邵燦
庚長毋失事機儻僅止懸擬之詞一時未能得手則徐州懷遠皆
關緊要不可以有用之兵調置一隅之地勝保到亳州後應先赴
懷遠或先赴潁州當已酌定如可徑赴懷遠則距宿尤近卽可就
近調度見在捻勢猖獗雖經伊興額等疊獲勝仗尙未擄其巢穴
必當實力兜剿以挫兇鋒使裹脅之徒聞風解散不可遷延時日
任令捻首久稽顯戮聚眾愈多致餉缺兵疲更形棘手將此由六
百里諭知英桂勝保並傳諭容照知之○庚寅諭內閣禮部等衙
門奏遵查中祀例案聲明請旨一摺嗣後致祭文昌帝君朕親
詣行禮之處著照致祭關帝廟之例由太常寺開次題奏雙籤
請旨○辛卯諭內閣慕東陵工程將次告竣翁心存著毋庸前
往住班訥爾經額著卽來京前赴慕東陵敬謹督工常川住班

○諭前因英桂等剿辦捻匪日久無功降旨交部分別嚴議議處茲據吏部等部遵旨議奏河南巡撫英桂業經革職暫行留任河北鎮總兵崇安屢次失律罪無可追著卽革職發往軍臺效力贖罪○諭軍機大臣等本日據載增等奏兵勇收復宜昌府城逆匪由東北遁往當陽遠安境內一摺前因賊匪窺伺荊州已諭官文胡林翼等酌量抽撥官兵前往助剿見在宜昌雖已收復而當陽遠安均山城僻縣毗連荊州西北地方最爲緊要載增等業經派盧又熊等帶勇千名進剿並飭守備胡舉高等帶勇守豐寶山曹立全等守江口以防回竄宜昌之路其宗維清錫齡阿等兵復經調回在西北一帶萬城等處迎頭防剿布置尙屬周妥前有旨令綿洵兼程赴荊州此時諒已抵任著卽會同載增富森督飭各軍相機追剿官文前派水師左光培並巴揚阿張萬祿馬步各兵胡

林翼前派唐協和所帶練勇亦卽日到著官文等卽飭與盧又熊一軍會合前進併力夾擊將當陽遠安竄匪悉數殲除毋得遷延時日再擾他處荊州各處逗留川勇並著戴增等收其軍械押送回川免致滋事將此由六百里各諭令知之○諭英桂奏捻匪南竄潁州派兵追剿並各路堵截一摺捻匪竄聚潁郡前據勝保奏報已降旨令勝保向前迎擊英桂亦督兵前進分投兜剿本日據英桂奏鄧家園等處尙有大股屯踞阻我南進之路見在穆騰阿在潁州接仗崇安攻剿鄧家園均未得手該匪西竄固爲可慮而虛張聲勢使我處處設防該逆得以南連粵逆亦不可不防自應上緊追躡使其不得喘息方能得手勝保到亳州後著卽督兵先赴潁州英桂亦當將鄧家園等處賊蹤掃蕩以便督兵前進邱聯恩帶兵前往光固自應出境迎剿不當徒防本境著卽飭令該

總兵與勝保穆騰阿馬步官軍四路會合力挫兇鋒該匪自不敢
向西窺伺徐州賊情見已稍鬆袁甲三即可駐紮亳州爲英桂勝
保後路聲援並兼顧歸德門戶所派德楞額托津阿等分赴潁州
懷遠之處均照所議速飭各員分投前進毋稍遲延將此由六百
里諭令知之○命丁憂侍郎何彤雲會辦雲南團練事宜○于湖
北陣亡同知李光榮祭葬世職○壬辰子湖北殉難道員延志等
祭葬世職○癸巳諭內閣本年四月二十日 孝靜康慈皇后梓
宮永遠奉安朕當親詣 慕東陵躬送 地宮用伸哀慕鉅典攸
關何敢稍從簡畧惟是上年近畿一帶蝗旱成災至今民困未蘇
正月閒卽據軍機大臣彭蘊章等籲請恭照三年二月 孝和睿
皇后奉安成例因時變通停止親詣朕追念 慈微愴懷靡已而
當此磬鴻徧野若復以蹕路經行重煩民力於心實有未安不得

不强抑悲懷勉從所請所有 孝靜康慈皇后梓宮奉安大典著
派恭親王奕訢屆期前往代朕行禮俟民力稍紓再行躬詣 山
陵虔伸誠悃朕勤恤民隱卽以仰慰 慈懷不得已之苦衷諒

在天之靈必當默鑒一切應行事宜著各該衙門直隸總督敬謹
豫備○以紳民犒師助勦免安徽太湖節年逋賦並永廣文武學
額各三名○甲午諭軍機大臣等恆春奏賓川回匪蠢動請調川
兵援應永北並陳明見難出省情形各一摺雲南各屬回匪紛紛
滋事上年十二月賓川州城內復有回匪分撲文武衙署肆行焚
燒各官均無下落永北一廳與該處接壤亟應撥兵堵勦俾免蔓
延惟滇省征兵四出見已無可分派著吳振械檄調建昌鎮官兵
卽照恆春所請飭令就近由鹽源縣直趨永北仍相機前進將賓
川匪徒速籌撲滅四川官兵調赴滇黔楚北等省者業已不少惟

永北地方喫重著吳振械酌量情形抽調官兵數百名前往助剿
早靖邊圉該官兵等糧餉卽由川省供支毋得貽誤恆春所稱在
省調度於東西兩路軍務可以兼顧俟一路肅清卽酌帶勝兵合
剿可壯聲威等語尙屬實情著准其暫緩出省俟一路得有就緒
卽行帶兵出省將各股匪徒次第掃除毋許遷延自干咎戾將此
由六百里各諭令知之○諭御史吳焯奏黑龍江呼蘭城迤北蒙
古爾山地方有荒原百餘萬晌平坦肥腴毗連吉林境界並非淺
貂禁地亦與夷船經由之路無涉咸豐四年該處將軍曾派員查
勘出票招佃嗣因俄夷下駛事遂中止並稱招佃時不收押租按
晌止收公用京錢數百文開墾之初山林木石聽民伐用樵採漁
獵一概不禁以廣招徠所得錢糧可充俸餉等語呼蘭城地方僻
遠開墾事宜是否可行如果有利可興原應豫爲籌畫以抵俸餉

之需惟事屬拊始有無窒礙著該將軍檢查從前原案察看情形據實具奏原摺著鈔給閱看將此諭令知之○官文胡林翼奏正月二十一二等日宜昌匪眾竄入宜都縣屬之白羊港經馬天貴會同署宜都縣知縣吉臨率勇迎剿該匪敗退臣等以該匪烏合之眾亟應乘其無備智取力攻以免負嵎因飛飭署宜昌總兵景輝等密授機宜迅速攻剿茲據景輝會同宜昌府知府阮福馳稟二十四日夜間調集弁兵練勇派署前營遊擊豐依本等攻西門東湖縣知縣王恩綸攻東門景輝與阮福圍攻南北二門該匪因黑夜未辨我軍虛實景輝令兵勇聲東擊西先於南門外縱火而潛令東西各路兵勇攀堞齊登揮殺悍賊多名城內匪眾狂竄卽開北門突圍而出被殺及自相踐踏死者不可勝數當將郡城克復敗匪由東北當陽荊門山路逃竄臣等查宜昌乃川楚咽喉下

接荊州重鎮而沙市又係商賈雲集之區必爲匪眾垂涎仰蒙

聖主威福未及旬日迅卽克復聲威甚壯匪膽自寒荊郡及沙市
一帶商民安堵如常見在飛飭各軍於荊門當陽等屬將敗竄餘
匪分道兜剿景輝等當匪徒入境未能實力攻剿咎無可辭惟於
水陸各軍未到以前率團克復郡城尙屬愧奮應請旨將景滄阮
福王恩綸一併革職仍暫留宜郡地方搜捕餘匪 上從之○乙
未予福建殉難知府金萬清祭葬世職入祀京師昭忠祠並於延
平府及會稽本籍建祠訓導劉維綱等祭葬世職○丙申諭軍機
大臣等英桂勝保奏逆捻南竄督兵剿擊並請皖軍由南面兜剿
各摺片捻匪張落刑等竄至潁州後聞官兵追至復渡淮河竄至
霍邱分踞三河尖李家集等處潁郡東南至潁上縣一帶均有賊
蹤屯聚自應督兵兜剿以杜紛竄勝保見帶兵千名馳往潁郡卽

著督同穆騰阿官兵探明逆首大股所在迎頭奮擊英桂亦卽移營前往以爲後路應援該匪奔突靡常毫境尙多伏莽見在大兵南去歸德一帶必須認真防剿毋令乘虛竄擾袁甲三見留亳州著卽督飭朱連泰所帶兵勇加意嚴防設該匪被擊回巢卽前後夾擊以期一鼓殲除英桂等追賊南下如亳州軍情緊要准袁甲三專摺奏報一面咨照該撫等相機調遣徐州蒙宿一帶據奏道路均已疏通史榮椿亦當移紮毫境並先酌撥馬隊前赴潁州會剿設或保安山餘匪未淨卽著酌留兵勇剿辦該鎮仍自督兵會同袁甲三相機堵剿以厚北路兵力著邵燦庚長卽飭該總兵迅速前進毋誤事機德勒格爾已赴懷遠惟該處捻蹤徧地是否阻塞尙難豫知著福濟飭令皖省諸軍由懷遠一帶兜截務令三省官兵聯絡一氣庶可剋期蕝事如各路帶兵之員自分畛域觀望

不前著英桂勝保嚴實嚴參以肅軍令所請飭直隸山東補額官
兵速來助剿之處山東兵業經奏明啟程本日復諭桂良飭催直
隸兵前往並令火器營撥火箭三百支解赴河南省城卽著英桂
豫飭該省派兵護送軍營將此由六百里各諭令知之○丁酉諭
內閣提督銜安徽壽春鎮總兵鄭魁士前有旨令會同英桂剿辦
捻匪見在攻剿桐城失利業經獲咎鄭魁士著毋庸會剿捻匪卽
與副都統麟瑞管帶各營兵勇均歸福濟節制○諭軍機大臣等
本日據福濟奏桐城兵潰廬州喫緊請撥北路馬步精兵三四千
名來皖等語秦定三鄭魁士等圍攻桐城自正月二十五日賊匪
大股屢次攻撲營盤二十九初一等日安慶賊黨四五萬人出撲
我軍飢疲已久復因糧道梗阻遂潰圍而出見在廬州情形萬分
喫緊必須添調兵力以資堵剿著桂良雙銳於景州駐紮之馬步

官兵內抽撥一千名派委妥員統帶卽日馳赴廬州前因無爲被陷卽諭令官文等分兵一千名赴廬助剿見在湖北荆宜一帶如已就肅清卽著官文胡林翼迅派陸路官兵一千名馳往協剿並督飭水師沿江東下以分賊勢甯國已經收復皖南軍務較鬆兵力當可抽撥著晏端書鄧紹良迅速籌商就近撥兵一千名或數百名渡江繞道赴廬州軍營聽候福濟調遣另片奏桐營兵潰鍋帳器械遺失甚多亟須添補請飭浙江撥銀八萬兩等語甯國雖已克復該省防剿未竣恐未能如數撥解並著晏端書酌撥銀四五萬兩解赴福濟軍營以資接濟將此由六百里各諭令知之○諭福濟奏桐城潰圍廬州喫緊請飭撥兵濟餉各等語賊匪全股竄入皖境秦定三等以飢疲之兵勇處腹背受敵之地以致力盡潰圍秦定三馳抵中海河是否能過六安前路鄭魁士等雖已出

圍折回廬郡而該逆已抵舒北舒城恐致失陷廬州存兵無多當此新挫之後恐軍威驟難復振朕心實深焦灼已諭桂良雙銳由直隸抽撥馬步官兵一千名並諭官文胡林翼於湖北得勝兵內酌派陸路兵一千名晏端書鄧紹良於甯國得勝兵內酌分一千名或數百名前往廬州均歸福濟調遣並降旨將鄭魁士麟瑞各軍悉聽該撫節制該撫務當激勵將士協同固守探明何路緊急相機剿辦勿得以官兵新挫自隳銳氣致有疏虞至兵飢餉竭關繫非輕山東既被水災又距皖較遠米石恐難轉運已諭英桂飭令該藩司於河南州縣採買米一二千石邵燦庚長於江北州縣採買米一二千石均解赴臨淮以給軍食浙江防剿未竣需款亦多該撫請撥銀八萬兩亦恐未能應付已諭晏端書酌撥銀四五萬兩解廬應用矣將此由六百里諭令知之○諭本日據福濟奏

桐城因糧缺兵潰廬州喫緊請由山東並蘇省之江北地方買米
解赴臨淮以資軍食等語奏定三等圍攻桐城因賊眾糧乏潰圍
而出廬州情形萬分緊要見撥各路官兵赴援必須軍餉接濟著
邵燦庚長迅速籌款卽於江北各州縣內採買米一二千石解赴
臨淮至山東被水州縣較多又距安徽遙遠恐難轉運著英桂速
飭藩司瑛棨委員於河南地方採辦米一二千石迅解臨淮見在
安徽待餉甚殷該督撫等務卽設法籌辦毋許遷延推諉致有貽
誤另片奏捻匪張落刑與龔得合併由劉伶集等處過沙河南投
李兆受決意南趨已咨催英桂撥兵繞出賊前徑抵六霍截剿等
語昨據英桂奏稱勝保帶兵馳往潁郡該撫亦移營前往距六霍
一帶甚近著卽安速布置並激勵各州縣鄉團齊心堵剿以助兵
力勿令該捻匪與粵匪勾連將此由六百里諭令知之○以勦辦

桐城賊匪不力擒秦定三鄭魁士頂帶花翎福濟下部議處○戊戌荊州左翼副都統載增等奏賊陷遠安偪近荆襄見籌會剿情形得旨綿洵見已抵任諒已遵前旨出城防剿汝三人務須和衷妥辦以保完善之區○壬寅諭內閣前因向榮督兵東下該營無文員襄辦是以派令前任鹽運使彭玉雯幫辦軍務辦理糧臺四載以來該運使並不與聞軍務至糧臺是其專責乃於應行報部之款經戶部疊次查催迄今延不造報實屬疲玩所有前派彭玉雯幫辦軍務之處著卽撤銷江南軍務糜餉甚鉅豈容毫無稽覈致開浮冒之弊著和春會同怡良責令該員趕緊將糧臺款目清釐造冊報部聽候查覈如再延宕卽著該部嚴參見在江南糧臺業經怡良等另派按察使楊能格接辦此後收支款項著卽飭令楊能格遵照戶部奏定章程依限造具毋許遲誤○諭軍機大臣

等勝保奏馳抵潁州並請調直隸防兵各等語勝保以軍營差委人員尙未到營朕念其平日勇敢特命幫辦剿匪事宜原欲責以實效豈容徒事張皇乃由毫至潁尙未與賊接仗而調將請兵紛紛不已獨不思直隸防兵數本無多似此任意分撥必致北路空虛本日已勉從所請諭知桂良雙銳將調赴廬州官兵一千名改撥潁州交勝保調遣此後若再請續調勢難抽撥況勝保所帶河北鎮兵及亳州分撥之兵加以各起馬隊並截留陝兵數已不少乃屢言擒匪與粵逆句結而駐守潁州不思急挫賊鋒豈將待其句結既成然後徐圖剿辦耶著卽趕緊進兵不得再有耽延致干咎戾英桂既有移營太和之議亦著迅速前進與勝保會合兜剿不得專以接仗之事委之勝保而託詞於後路聲援至光固一帶防堵前據英桂奏調回邱聯恩與王庭蘭嚴密防剿見在南陽情

形是否稍鬆儻慶德周煦徵尙能得力卽著邱聯恩速赴光固實力防剿以扼該匪西竄之路毋稍疏虞將此由六百里各諭令知之○諭本日據勝保奏捻匪麇聚潁霍阜固諸境欲投粵逆句結北竄請於直隸防兵內酌撥馬步一二千名助剿等語北路之兵見已無可分撥惟廬州需調之兵已據和春由句容軍營揀派官兵八百餘名前往所有直隸調赴廬州之官兵一千名卽著桂良雙銳飭令改赴潁州軍營交勝保調遣並飭迅速啟程毋稍延緩將此諭令知之○諭和春奏山東青州德州原派滿洲營官兵一千名前由河南赴揚州助剿除病故陣亡外尙存八百名隨往廬州甚爲奮勇見在帶往江南軍營疊次出缺撤回止存六百餘名擬添調二百名赴營隨剿等語此時句容溧水節次進攻正當喫緊著崇恩恩夔卽於青州滿洲營存兵內挑選精壯二百名配齊

軍裝器械並帶口糧飭令迅速前赴和春軍營以資調遣將此由
四百里各諭令知之○以江南營員藉端挾制革郎中盧應翔職
撤總兵余萬清幫辦軍務○癸卯諭內閣前因愛仁奏銀錢鈔票
請仍准互換等語當經降旨令戶部議奏茲據酌議覆奏見在寶
鈔業已暢行官票一項自應量爲變通使鈔票並重無分軒輊著
卽照所議以官票掣字換給寶鈔按月收發以便商民而資利用
○甲辰諭內閣綿洵等奏逆匪陷荊門州城經官兵擊退收復城
池見飭追剿一摺二月初六日遠安逆匪全竄荊門遂致州城失
陷該匪卽乘勢南竄經馬步各隊迎頭截擊守備胡舉高訓導鄒
漢章等分帶川勇南勇進攻該匪前後受敵立即折回兵勇追至
城下適該州團勇會合夾擊設伏圍攻該匪卽於初九日夜半潛
開北門遁去各軍分投追剿並將城內餘匪全數殲除收復荊門

州城著該將軍等卽飭巴揚阿等乘勝追剿盡殲醜類並分兵堵截毋令旁竄荊門州文武各員有無先期逃避情事此次克復州城是否隨同攻剿著官文胡林翼會同綿洵等確查具奏○乙巳諭內閣李鈞奏山東省徵收錢糧請明定收鈔章程等語上年山東省錢糧並未搭收寶鈔據該撫奏請俟本年上半年上忙爲始再行察看辦理見在河工放款用鈔較多必須設法流通以資周轉所有山東省本年上忙徵收地丁雜稅或照部議搭收五成寶鈔或於二成官票外再搭寶鈔二成著崇恩體察情形明定章程具奏○撥戶部寶鈔十六萬串解往山東備東河工需○以山東災歉免海口商販米稅○丙午諭軍機大臣等英桂奏捻匪圍撲固始縣城派兵援剿一摺捻匪由三河尖圍撲固始息縣烏龍集一帶亦有賊蹤其勢已向西趨自應力援豫境以保完善之地該撫已調

穆騰阿帶馬隊並副將樂善帶步隊由潁州繞出賊前馳往固始援剿著卽督飭穆騰阿等會同該地方文武激勵鄉團迅解城圍並將息縣一帶賊匪設法剿除勝保見擬督兵前進英桂亦卽赴新息一帶會督在防文武救援以杜賊蹤北竄一俟攻剿得手並著跟蹤追剿毋得株守一隅致有貽誤潁郡柳溝集等處賊匪負隅堅守一聞大兵回援固始勢必乘虛竄擾該撫仍須力籌堵截不可顧此失彼其亳州鄧家園各賊巢仍卽咨照袁甲三飭令朱連泰等實力攻剿以期漸次肅清將此由六百里各諭令知之○丁未官文胡林翼奏二月初二日宿松匪眾三路上竄一由亭前驛南一由亭前驛北一由獨山鎮竄及魏家涼亭各距黃梅縣城數十里臣都與阿先期商派營總巴依爾呼蘭等各率兵勇紳團分路迎剿斃賊數百餘逆逃竄桂家畝一帶據生擒賊目僉供宿

松僞攝天候陳玉城等糾集太湖逆黨四萬餘將踞黃梅而竄蕪
州等語署黃梅縣知縣覃瀚元密商都興阿等將計就計以空城
誘賊入內而於要隘設伏擊之初三日逆眾由馬尾山桂家畝王
家河三路上犯各萬餘人見城內空虛長驅直入各路騎馬賊不
下千餘亦馳驟而至都興阿分撥馬隊槍箭齊施王國才等分撥
步軍刀矛並刺立斃悍賊多名馬尾山桂家畝兩路之賊先敗王
家河賊眾亦潰初四日覃瀚元派紳勇伏於城內翼長多隆阿帶
隊由城南進擊營總倭克錦依由城北截勦王國才鮑超方映川
由城西一帶分路進兵城內老賊數千驍勇異常死力拒敵復有
獨山鎮股賊五六千鈔出我軍步隊之後勢將不支適巴依爾呼
蘭馬隊趕到縱橫衝擊賊勢披靡立斬悍賊數百名餘逆棄城逃
竄我軍分投截擊越嶺追勦共斃賊四千餘名奪獲馬數百匹

該逆本欲援應九江直踞黃梅乃官軍以少擊眾大獲全勝下游
逆眾自必聞風膽落

臣

等見仍嚴密扼守一面會合水陸各軍環

攻小池口及九江郡城設計圍困絕其應援期於迅速得手 上

諭內閣此次攻勦援賊獲勝並小池口踏賊營壘出力員弁紳勇
均著准其彙案保奏候朕施恩仍著官文翰林翼督飭在事文武
水陸環攻務將小池口及九江郡城之賊趕緊攻克毋稍延緩○
以雙福爲內閣學士

由左副都御史遷

○戊申諭軍機大臣等福濟等奏

六安失陷廬城兵單請飭勝保由正陽迎勦一摺正陽關爲北路
要衝雖有署廬鳳道金光筭帶兵堅守而爲數無多自應撥兵赴
援惟見在潁州擒匪甚熾固始縣城被圍勝保所帶之兵本止三
千二百餘名已分馬隊六百名步隊七成渡淮西上其截留之陝
甘兵並改撥之直隸兵此時尙未抵潁正陽一路恐勝保未能兼

顧然於無可籌撥之中仍應酌撥數百名馳援以顧大局亳州一帶擒匪南竄該處有朱連泰等沿途攻剿或卽令袁甲三酌帶兵勇前赴正陽另派妥員會同朱連泰等攻鄧家園等處零匪著英桂勝保妥爲籌畫趕緊布置如亳州緊要袁甲三不能前往另有妥員可派亦著迅速奏明辦理萬不可稍有遲延致誤大局福濟惟當力保廬州俟和春派往之密雲等兵邵燦等派往之關保馬隊及皖南酌撥官兵陸續到廬卽可進圖規復所請飭催餉銀山陝兩省本係按月籌解廣東道路較遠前俱有旨飭令撥解本日復諭晏端書將前撥之款速解並諭怡良於截漕等項下籌款接濟矣邵燦等籌撥之米昨據奏報已辦二千石本日復令再備一二千石解往但須淮河道路無梗方能達到並著福濟設法迎提以資軍食將此由六百里加緊各諭令知之○諭本日據福濟奏

六安失陷廬州危急請飭催各省協濟軍餉等語前因桐營兵潰亟須添補軍械諭令晏端書酌撥銀四五萬兩解往福濟軍營見在皖省待餉情形甚爲緊迫著晏端書趕緊如數籌撥浙省距廬程途較近務於三月內解到以濟急需並著怡良於江蘇截留漕糧及地丁等項下不拘多少酌量抽撥先行解赴廬州以資接濟至前諭邵燦庚長採米一二千石運赴臨淮昨據奏到於未奉諭旨之先已購買二千石見在皖省每石米糧需制錢二十餘串是該處需米情形尤關緊要著邵燦庚長卽行設法再購米一二千石派員陸續運赴臨淮藉資兵食俾無缺乏將此由六百里各諭令知之○調寶鋆爲戶部右侍郎愛仁爲禮部右侍郎轉伊勒東阿爲理藩院左侍郎以孟保爲理藩院右侍郎由通政使遷○予安徽陣亡道員恩保祭葬世職○己酉諭內閣駱秉章奏統兵大員見

丁父憂一摺兵部侍郎曾國藩之父曾麟書在籍病故該侍郎見在江西督師軍務正當喫緊古人墨經從戎原可奪情不令回籍惟念該侍郎素性拘謹前因母喪未終授以官職具摺力辭今丁父憂若不令其回籍奔喪非所以遂其孝思曾國藩著賞假三箇月回籍治喪並賞銀四百兩由湖南藩庫給發俾經理喪事俟假滿後再赴江西督辦軍務以示體恤○諭軍機大臣等蔣霽遠奏兵練潰散提督自戕一摺兵練閒有潰逃自應設法收集該提督身任大員何至遽爾輕生據奏弁兵等聞響進帳該提督尙未氣絕何以並無遺言難免非被人謀害呈報時裝點情節抑或誤遣火種以致烏槍然發俱未可知若指爲自戕實難憑信著蔣霽遠密查確實情形再行具奏至佟攀梅駐紮麻哈州該處距都勻不遠見既授爲提督卽應馳赴都勻統領全軍其麻哈州一路攻剿

亦屬喫緊著蔣霽遠會商佟攀梅卽行選派得力大員前往駐紮以資控制所請飭催各省軍餉前據蔣霽遠奏到業經交戶部速議已據該部覆奏照該撫單開款項加緊嚴催矣將此由六百里諭令知之○諭本日據駱秉章馳奏曾國藩之父曾麟書在籍病故已有旨賞假三月治喪矣曾國藩所帶湖南兵勇著暫交其弟曾國華統帶俟曾國藩銷假再令曾國華回籍著福興文俊傳旨諭知曾國藩等遵行見在江西軍務正當喫緊曾國華尙在瑞州卽著飭令回省統帶曾國藩一軍該員屢著戰功諒能得力福興想已到省與文俊等面商勦辦機宜撫建一帶賊勢鴟張福興是否仍留廣信前往攻剿其九江賊匪經湖北水師東下聲勢甚壯自可卽日攻克著福興會同文俊通籌大局妥爲布置並將見在各路情形奏報以慰廑念將此由五百里諭令知之○予故貴州

提督孝順祭葬卹廕諡壯肅賞其孫府經歷博爾歡泰以知縣用
○辛亥諭內閣御史趙元模奏請嚴禁遏糴暫免抽釐等語據稱
江北六合等縣米價騰貴皆由聚米之處閉糴居奇其遠道販運
者經過地方到處抽釐以致商賈不通於民食大有關繫著怡良
趙德輶卽飭江北一帶各州縣嚴禁遏糴暫免抽釐俟麥熟後再
行酌量收稅以平市價而裕民食○諭軍機大臣等前據恆春奏
賓川回匪蠢動請調川兵援應永北一摺朕因四川官兵外調不
少而永北地方喫重亦須亟籌援應當經諭令吳振械酌撥數百
名前往助剿茲據該督奏稱川省各營兵丁無可調撥請飭該省
督撫另行設法調練募勇等語所奏雖係實情但永北一應地與
賓川接壤滇省既鞭長莫及若川省復不協濟兵力恐匪勢蔓延
更難撲滅著吳振械仍遵前旨酌抽官兵數百名飭令由鹽源一

帶相機進剿不得視同隔膜致有貽誤將此由五百里諭令知之
○壬子諭軍機大臣等英桂勝保奏奪回烏龍集賊巢後連獲大
勝並請調湖北馬隊及暫留察哈爾馬隊助剿等語烏龍集大股
捻匪既被官軍奪其巢穴賊膽已寒自應直趨固始急解城圍而
我兵前隊與固邑聲息尙未能通息縣接壤之地伏莽尙多見在
勝保帶兵節節進剿英桂暫駐新蔡爲勝保後路接應必須聯絡
聲勢兼杜內竄之路攻剿方能得手且六安一帶已有長髮賊黨
竄踞斷不可令捻匪勾連粵逆致有蔓延侍衛托精阿所帶馬隊
經勝保飭赴三塔集會剿尙能得力著准其暫留勝保軍營調遣
惟廬州賊餒甚張兵力亦極單薄此項馬隊俟道路可通仍卽飭
赴福濟軍營毋得久留至武漢雖經克復所存馬隊無多已據官
文等奏不能分撥赴豫見在浙川廳屬內鄉縣境均有匪蹤竄擾

本日已諭官文等飭令楚陝帶兵將弁由西路繞出賊前與邱聯恩會合堵剿但南陽陝汝情形喫重著英桂迅飭該總兵務就見有兵勇會集地方團練實力堵剿毋稍疏懈將此由六百里諭令知之○諭英桂奏楚匪擾及豫疆請飭湖北酌調馬隊協剿等語據稱楚省股匪由均州竄至李官橋經邱聯恩督兵進偪該匪聞風西竄見在內鄉淅川一帶已有匪蹤情形極爲喫重此股匪徒竄至均房穀城等處總未大受懲創以致肆行紛擾日久蔓延亟應厚集兵力剋日埽除湖北馬隊無多前已據官文奏明未便調撥自係實情卽著飭令派出之巴揚阿等馬步各隊將本境匪徒實力搜捕繞出賊前與邱聯恩會合兜擊以杜該匪西竄之路前任鹽法道常恩業經胡林翼奏參革職所統兵勇是否仍令管帶抑已另派妥員接管並著飭令進剿毋許玩延陝西副將龍澤厚

等統帶各軍業經譚廷襄奏明於克復竹山縣城後仍令跟蹤追
剿此項官軍著官文等查明見在何處一併嚴飭會剿儻畏憚不
能用命卽行嚴參懲辦將此由五百里諭令知之○諭本日邵燦
庚長奏迎剿宿永捻匪獲勝摺內據稱邳州郟城交界之間又新
起捻匪千餘人往來肆擾史榮椿等已帶兵前往安徽惟留伊興
額帶領存營兵勇防剿等語山東沂州府屬與徐州交界處所本
爲匪徒出沒之地見在郟城界內既有新起捻匪必須及早撲滅
著崇恩卽飭該地方文武並酌派官兵迅速掩捕免致蔓延仍一
面咨照邵燦等飭令徐州帶兵各員無分畛域會同兜剿務將此
股捻匪悉數殲除將此由五百里諭令知之○調崇綸爲倉場侍
郎以德全爲工部左侍郎由鑲黃旗護軍統領還○是月展緩江蘇丹陽等

三縣被擾未完五年額賦